

Dantza maitaleak nonahi

IRAILA dantzaz blai dator, zenbait hitzordu garrantzitsu baitugu egunotan. Alde batetik Miarritzeko Maitaldia, Euskal Herrian egiten den handienetakoa, diziplina garaikidearen joera eta estiloen espektro zabala eskainiko ditu. 44 saio antolatuko dira, horietatik 18 aretotan, nazioarteko eta Euskal Herriko 26 dantza konpainiaren eskutik. Jendaurreko entsegu, erakusketa, dantzari buruzko film, mintzaldi eta ikastaroek osatuko dute aurtengo Maitaldiko programa oparoa. Eskaintza zabala, dudarik gabe, aurreko edizioan 18.000 ikusle erakarri eta aurtengoan beste horrenbeste lortu nahi baitute. “Ipar Euskal Herriko jende asko hurbiltzen da jaialdira, baina ez hainbeste Hegoaldekoa eta horiek erakarri nahi ditugu”, diosku Maitaldiko kanpo harremanetarako arduradun Eloixa Ospitalek. Konpainia handiak eta ezagunak, baina baita proposamen ausart eta berritzaileak ere, aurtun ikusi ahal izango direnak.

Flandriako Royal Balletek zabalduko du jaialdia, *Ulisesen Itzulera* obrarekin. 43 dantzari biltzen ditu ikuskariak. Irailaren 19an Norvegiako Dantza Garaikide Konpainia Nazionalak *Not Here / Not Ever* taularatu du Gare du Midi aretoan.

Dantza konpainia txikien proposamenei ere tokia egingo die ekimenak. Vilcanota dantza konpainiak eta Les Blérots de Ravel bandak, esaterako, zuzeneko rock musika eta dantza garaikidea batuko dituzte *L'Homme D'Habitude* lanean. Bestetik, La Coma dantza taldeak *Cartel* izeneko lana erakutsiko du. Jean Guizerix Parisko Operako dantzari ohia eta Romain di Fazio dantzari klasiko gaztea batu dira lan hone-tan, dantzaren iraganaz eta etorkizunaz jarduteko. Oraina eta dantza-ren biluztea dute ardatz.

Kalea, espazio eszeniko

Dantza Hirian jaialdi entzutetsuak Donostia eta Baiona arteko kale eta plazak jantziko ditu dantza garaikidez. Maitaldian ez bezala, saioak



- **Maitaldia. Non:** Miarritzeko Colisée, Gare du Midi eta Casino aretoetan. **Noiz:** irailaren 12tik 21era.
- **Dantza Hirian. Non:** Donostia, Erreterria, Pasaia, Irun, Hondarribia, Hendaia, Azkaine, Miarritze, Bidarte, Donibane Lohizune, Baiona. **Noiz:** irailaren 11tik 28ra.

doan izango dira, eta toki zabaletan, ez aretoetan, irailaren 11tik 28ra.

Uztailaren egindako egonaldien emaitza erakutsiko du Bartzelonako Jordi Vilaseca konpainiak, *Azala* izeneko lanarekin, Hendaia Itsas pasealekuan, hilaren 13an. Jaialdiak antolatutako beste egonaldi bati esker, Lasala Donostiako dantza konpainiak *Lauesku* estreinatuko du irailaren 19an, San Telmo museon.

Dantza Hirian jaialdiak hainbat ekimen bultzatuko ditu gainera. Besteak beste II Battle Break Dance saioa Irunen, jaialdiarekin batera egingo den BegiraDan argazki lehiaketa, tailerrak eta ikastaroak, edota dantzarien komunitatea batzea xede duen Nexos topaketa.

Madril, Bartzelona, Valentzia, Bordele edo Israelgo konpainiak izango dira gure artean, euskal dantza taldeekin batera. Aipagarria da Donostiako Dantzaz konpainiak Pasaian erakutsiko duen *Chameleon*, irailaren 21ean. Pasai Donibanetik

San Pedrorako joan-etorriko txalupan egingo dute.

Jaialdiko azken asteburuan, hilaren 27an eta 28an, Baionan eta Erreterrian egingo dira erakustaldiak. Larunbatean, 4 eta 12 urte bitarteko haurrentzako marrazki tailerra izango da Baionan, Les Halles azokan, 16:30ean. Honen ostean, merkatuan bertan, Sharon Fridman Bartzelonako konpainiak *Noraino?* lana erakutsiko du. Jarraian, Montaut Plazan Bordeleko Revolution taldeak *Deep* lana eszenaratuko du, eta gero, Lacarre Plazan Madrileko Daniel Doña konpainiak *A pie de calle* erakutsiko du.

Igandean, Erreterrian, Hiriburuko Etorkizuna dantza taldeak *Leibotik* lana erakutsiko du 18:00etan. Honen ostean, Lali Ayguade eta Nicolas Ricchini dantzariak *Incognito* lana dantzatuko dute. ■

Myriam Garzia

